

# भए प्रगट कृपाला, दीनदयाला कौसल्या हितकारी ।

भए प्रगट कृपाला, दीनदयाला,  
कौसल्या हितकारी ।  
हरषित महतारी, मुनि मन हारी,  
अद्भुत रूप बिचारी ॥

लोचन अभिरामा, तनु घनस्यामा,  
निज आयुध भुजचारी ।  
भूषन बनमाला, नयन बिसाला,  
सोभासिंधु खरारी ॥

कह दुइ कर जोरी, अस्तुति तोरी,  
केहि बिधि करूं अनंता ।  
माया गुन ग्यानातीत अमाना,  
वेद पुरान भनंता ॥

करुना सुख सागर, सब गुन आगर,  
जेहि गावहिं श्रुति संता ।  
सो मम हित लागी, जन अनुरागी,  
भयउ प्रगट श्रीकंता ॥

ब्रह्मांड निकाया, निर्मित माया,  
रोम रोम प्रति बेद कहै ।  
मम उर सो बासी, यह उपहासी,  
सुनत धीर मति थिर न रहै ॥

उपजा जब ग्याना, प्रभु मुसुकाना,  
चरित बहुत बिधि कीन्ह चहै ।  
कहि कथा सुहाई, मातु बुझाई,  
जेहि प्रकार सुत प्रेम लहै ॥

माता पुनि बोली, सो मति डोली,  
तजहु तात यह रूपा ।  
कीजै सिसुलीला, अति प्रियसीला,  
यह सुख परम अनूपा ॥

सुनि बचन सुजाना, रोदन ठाना,  
होइ बालक सुरभूपा ।  
यह चरित जे गावहिं, हरिपद पावहिं,  
ते न परहिं भवकूपा ॥

भए प्रगट कृपाला, दीनदयाला,  
कौसल्या हितकारी ।  
हरषित महतारी, मुनि मन हारी,  
अद्भुत रूप बिचारी ॥

श्री राम, जय राम, जय जय राम

Source:

<https://www.bharattemples.com/bhaye-pragat-kripala-deen-dayala-kosalya-hitkari/>



# Bharat Temples

Complete Bhajans Collections - Download Free Android App

<https://play.google.com/store/apps/details?id=com.numetive.bhajans>

Facebook: <https://www.facebook.com/bharattemples/>

Telegram: <https://t.me/bharattemples>

Youtube: <https://www.youtube.com/channel/UC24oJCxZjyhhKzSUD-Lt9Tw>